

**1. januar 2011 aallarnerfigalugu naartuersittarnerup akileeqataaffigineqartalernissaanik Naalakkersuisut sulissuteqaqqullugit Inatsisartut aalajangiiffigisassaattut siunnersuut**

(Inatsisartunut ilaasortaq Malik Berthelsen, Siumut)

**Akissuteqaat**

(Peqqissutsimut Naalakkersuisoq, Agathe Fontain)

**Aappassaaneerneqarnera**

Kissaatigingisamik naartulersarnerit ikilisinniarlugit siunnersuutigineqartumi siunertarineqartoq Naalakkersuisut isumaqatiginnginngilaat, Naalakkersuisulli periuserineqarniartoq tunngaviatigut isumaqatiginngilaat.

Naalakkersuisut isumaat unaavoq, akileeqataatitsisoqartalissappat inuiaqatigijit peqqinnissaqarfimmit sullinneqarneranni assigiinngisitsisoqalissasoq. Isuma taanna pineqartumi ilisimatusarnikkut uppermarsineqarsimavoq.

Naartuersittarnerit taakkorpiaat eqqarsaatigalugit akileeqataatitsisoqartalissappat arnat angutillu naligiissaanissaannik Naalakkersuisut tunngaviatigut kissaatigisaannut aporaattoqartussaavoq, akiliisitsisarneq aallaavimmigut arnamut sammissammat. Naak naartuersittariaqalersimanermut angut arnarlu tamarmik akisussaaqatigiikkaluartut.

Akerlianik Naalakkersuisut kissaatigaat Inuunerittap akuersissutigineqarneratigut anguniakkatut pitsaliuinermik peqqissutsimillu siuarsaanermik suliat nukitorsarneqarlutillu ineriartortittuarneqarnissaat.

Siunnersuutip itigartinneqarnissaa Naalakkersuisut aammaarlutik inassutigivaat.